

Na osnovu člana 107. stav 4., a u vezi sa članom 220. stav 1. tačka 1. Zakona o vodama ("Službene novine Federacije BiH", broj 70/06), federalni ministar poljoprivrede, vodoprivrede i šumarstva d o n o s i

**PRAVILNIK  
O IZMJENAMA I DOPUNAMA PRAVILNIKA O  
SADRŽAJU, OBLIKU, USLOVIMA, NAČINU IZDAVANJA I  
ČUVANJA VODNIH AKATA**

**Član 1.**

U Pravilniku o sadržaju, obliku, uslovima, načinu izdavanja i čuvanja vodnih akata ("Službene novine Federacije BiH", br. 6/08, 57/09 i 72/09) u članu 3. stav 1:

- tačka 1. riječi: „uključujući i djelatnosti koje koriste vodu u prirodnim ili vještačkim nalazištima (bez posebnih objekata zahvatanja, kao što su uzgoj ribe, sport i rekreacija, plovidba i sl.),“ brišu se. Dodaje se nova alineja f) koja glasi: „f) uzgoj ribe u ribnjacima“;
- tačka 5. mijenja se i glasi: „5. vađenje materijala iz vodotoka radi uređenja plovnog puta i održavanja plovnosti ili obezbjeđenja kapaciteta proticajnog profila korita, odnosno održavanja vodotoka i vodnog dobra“;
- tačka 8. mijenja se glasi: „8. Izgradnju vodnih objekata iz člana 14. stav 1. tač.1. i 2. Zakona (zaštitni objekti i objekti za odvodnjavanje)“;
- tačka 14. mijenja se glasi: „14. uređenje vodotoka koje obuhvata:
  - a) izvođenje zemljanih i sličnih radova na uređenju riječnog korita i obale, te oblaganje korita i obale koji nisu obuhvaćeni članom 14. Zakona,
  - b) uređenje kupališta, ribarskih staza, ribljih revira, šetališta i sl.“;
- dodaje se nova tačka 15. koja glasi: „15. zahvate i izgradnju objekata na vodnom dobru iz člana 12. stav 1. tač. 3, 4. i 7. Zakona“.

Stav 2. ovog člana mijenja se i glasi:

„Pored aktivnosti iz stava 1. ovog člana, vodni akti se izdaju i za aktivnosti koje mogu imati specifične uticaje na vode, kao što su:

- kafezni uzgoj ribe,
- rudarski i eksploatacioni radovi,
- istražni i drugi radovi i aktivnosti koji nisu navedeni u ovom članu, a koji mogu imati specifične uticaje na vode navedene u članu 109. stav 2. Zakona, što se cijeni u svakom pojedinačnom slučaju.“

**Član 2.**

U članu 4. stav 1:

- u tački 9. riječi: „izgradnju objekata za zaštitu od poplava“ zamjenjuju se riječima: „izgradnju vodnih objekata iz člana 14. stav 1. tač. 1. i 2. Zakona (zaštitni objekti i objekti za odvodnjavanje) uz ili“;
- dodaje se nova tačka 15. koja glasi: „15. zahvate i izgradnju objekata iz člana 12. stav 1. tač. 3, 4. i 7. Zakona na vodnom dobru uz površinske vode I kategorije;“
- sadašnja tačka 15. postaje tačka 16.

U članu 4. stav 2:

- u tački 6. riječi: „izgradnju objekata za zaštitu od poplava“ zamjenjuju se riječima: „izgradnju vodnih objekata iz člana 14. stav 1. tač. 1. i 2. Zakona (zaštitni objekti i objekti za odvodnjavanje) uz ili“;
- dodaje se nova tačka 11. koja glasi: „11. zahvate i izgradnju objekata iz člana 12. stav 1. tač. 3, 4. i 7. Zakona na vodnom dobru uz površinske vode II kategorije.“

### **Član 3.**

U članu 6. stav 1. mijenja se i glasi:

„Postupak za izdavanje vodnih akata pokreće se po zahtjevu fizičkog lica, pravnog lica ili organa određenog za podnošenje zahtjeva za izdavanje vodnog akta (u daljem tekstu: podnosilac zahtjeva), u skladu sa odredbom člana 120. stav 1. Zakona, osim u slučajevima:

- izdavanja vodnih akata za aktivnosti vađenja materijala iz vodotoka iz člana 3. stav 1. tačka 5. i uređenje vodotoka iz člana 3. stav 1. tačka 14.a) ovog pravilnika, za koje postupak pokreće nadležni organ za upravljanje vodama po službenoj dužnosti i
- izdavanje vodnih akata za aktivnosti uređenja vodotoka iz člana 3. stav 1. tačka 14.b) ovog pravilnika, koje postupak pokreće nadležni organ za upravljanje vodama po zahtjevu jedinica lokalne samouprave.“

### **Član 4.**

U članu 11. st. 1. i 2. mijenjaju se i glase:

„U aktu prethodne vodne saglasnosti se odlučuje o postojanju uslova za ostvarivanje prava na vodu prema podnesenom zahtjevu na konkretnoj lokaciji i za konkretnu namjenu, te utvrđuju uslovi kojima mora udovoljiti dokumentacija za građenje objekata i izvođenje aktivnosti, a koja treba biti podnesena uz zahtjev za izdavanje vodne saglasnosti za te objekte i aktivnosti.

Izuzetno, za vađenje materijala iz vodotoka, koje obuhvata uklanjanje i vađenje nanosa (šljunka i pijeska) iz formiranih sprudišta na obalama i u koritu vodotoka, u aktu prethodne vodne saglasnosti, nakon stručnog uvida na lokalitetu (o stručnom uvidu na lokalitetu sačinjava se zapisnik sa fotodokumentacijom) i provedenih potrebnih analiza i istraživanja, odlučuje se o postojanju potrebe za vađenje materijala, te utvrđuju uslovi kojima mora udovoljiti dokumentacija, a koja treba biti podnesena uz zahtjev za izdavanje vodne saglasnosti za tu aktivnost.“

Dodaje se novi stav 3. koji glasi:

„Za vađenje materijala iz kinete plovnog puta u svrhu obezbjeđenja plovnosti, u aktu prethodne vodne saglasnosti, do donošenja Pravilnika o održavanju plovnog puta rijeke Save i rijeke Une od strane Vijeća ministara Bosne i Hercegovine, odlučuje se o postojanju potrebe, na osnovu hidrografskog snimanja uzdužnog i poprečnih profila korita na predmetnoj dionici vodotoka sa ucrtanom osovinom i kinetom plovnog puta i proračunatim nivoom male vode 95%-tnog trajanja proticaja, a za gabarite kinete: širina 70 m, dubina 2,50 m od nivoa male vode i nagibe pokosa 1:3 (sve prema projektu plovnog puta). Razmak snimljenih poprečnih profila ne smije biti veći od 50 m.“

Sadašnji st. 3. i 4. postaju redom st. 4. i 5.

### **Član 5.**

U članu 14. u stavu 2. riječi: „i 2.“ brišu se.

Dodaju se novi st. 2. i 3. koji glase:

„Prethodnom vodnom saglasnošću za vađenje materijala iz vodotoka se uslovljava da se u elaboratu za vađenje materijala iz vodotoka, shodno odredbi člana 63. Zakona, izvrše, u zavisnosti od konkretnog slučaja, potrebna istraživanja i analize i to:

1. hidrološki istražni radovi,
2. hidraulički proračun razmatrane dionice vodotoka za postojeće i buduće stanje nakon vađenja materijala,
3. geodetska snimanja (ne starije od tri mjeseca) situacije i poprečnih profila riječnog korita (na rastojanju do 50,00 m), koja se izvode preko operativnog poligonog vlaka sa osiguranjem krajnjih tačaka poprečnih profila na terenu trajnim biljegama, preko kojih će se po završetku radova izvršiti kontrolna geodetska snimanja,
4. izrada situacije lokaliteta na kome se planira vađenje materijala, uzdužnog i poprečnih profila riječnog korita u odgovarajućoj razmjeri,
5. tehničko rješenje načina i obima radova (osim za vađenje materijala iz kinete plovnog puta jer se isto treba vršiti prema projektu plovnog puta) koje će obavezno uzeti u obzir da se tim radovima bitno ne remete prirodni procesi, ne remeti prirodna ravnoteža ekosistema ili ne pospiješi štetno djelovanje voda,
6. dinamika vađenja materijala,
7. bilans masa materijala,
8. lokaciju i površinu deponije,
9. mogući uticaj na izvorište pitke vode čije se zone sanitarne zaštite prostiru ili su u neposrednoj blizini predmetnog lokaliteta i uslovi za zaštitu izvorišta prilikom izvođenja radova,
10. druge podatke ovisno o konkretnoj situaciji.

„Elaborat iz stava 2. ovog člana treba biti izrađen od strane pravnog lica koje ispunjava uvjete i kriterije propisane podzakonskim propisom iz člana 120. stav 6. Zakona.“

## **Član 6.**

U članu 17. stav 1. u alineji 3. broj: „30“ mijenja se brojem „29“.

## **Član 7.**

Član 20. mijenja se i glasi:

„Vodna saglasnost za vađenje materijala iz vodotoka izdaje se na osnovu elaborata izrađenog u skladu sa odredbama člana 14. st. 2. i 3. ovog pravilnika.

Vodnu saglasnost za vađenje materijala nadležni organ izdaje po službenoj dužnosti uz ovjeru elaborata upisivanjem broja i stavljanjem otiska pečata.

Vodna saglasnost, pored ostalog, obavezno sadrži uslove za uređenje lokaliteta i predmetne dionice vodotoka, obavezu kontrolnog geodetskog snimanja riječnog korita nakon izvršenja radova, te obavezu izvođaču radova da je prilikom izvođenja istih obavezan na mjestu izvođenja radova posjedovati izdatu vodnu saglasnost, ovjereni elaborat i ugovor o izvođenju predmetnih radova.

Vodna saglasnost za vađenje materijala važi za tekuću godinu u kojoj je izdata vodna saglasnost.

Vodna saglasnost za vađenje materijala prestaje i prije isteka vremena iz stava 4. ovog člana, ako se pregledom od strane nadležne vodne inspekcije utvrdi da se izvođač radova (korisnik vodne saglasnosti nije pridržavao uslova određenih u vodnoj saglasnosti) ili ako se utvrdi da korisnik vodne saglasnosti ne plaća ili neuredno plaća posebnu vodnu naknadu za vađenje materijala iz vodotoka.

Po isteku roka važenja vodne saglasnosti za vađenje materijala iz vodotoka izvođač radova koji je vršio vađenje materijala dužan je u najkraćem roku dovesti korito i obale vodotoka u stanje predviđeno vodnom saglasnosti.

U slučaju da izvođač radova ne udovolji obavezi iz stava 6. ovog člana ni poslije pisanog upozorenja od strane nadležne vodne inspekcije, nadležni organ po službenoj dužnosti angažovaće drugog izvođača za izvršenje naređenih mjera na trošak izvođača radova koji je doveo korito i obale vodotoka u neispravno stanje.”

#### **Član 8.**

U članu 21. stav 3. tačka 3. na kraju teksta dodaje se riječi: „ukoliko ista nije izdata od organa koji vodi postupak“;

U tački 6. iza riječi: „efluenta“ dodaju se riječi: „osim ako se radi o zahtjevu za izdavanje vodne dozvole za probni rad“.

Dodaje se nova tačka 7. koja glasi:

„7. kopija zapisnika o izvršenom tehničkom pregledu objekta;“

Sadašnja tačka 7. postaje tačka 8.

#### **Član 9.**

U članu 25. u stavu 5. iza riječi: „žalitelju“ riječi: „i objavljuje na oglasnoj ploči i web stranici nadležne agencije, odnosno organa iz člana 7. stav 3. ovog Pravilnika“ brišu se.

#### **Član 10.**

Ovlašćuje se stručna radna grupa imenovana rješenjem Federalnog ministarstva poljoprivrede, vodoprivrede i šumarstva broj: 05-25-2416/11 od 22.11.2011. godine da utvrdi prečišćeni tekst Pravilnika.

#### **Član 11.**

Ovaj pravilnik stupa na snagu osmog dana od dana objave u "Službenim novinama Federacije BiH".

**MINISTAR**

**Jerko Ivanković - Lijanović**

Broj: 05-1-25-1227-4/12  
Sarajevo, 30.07.2012. godine